

**Aningaasarsianit akileraarutit pillugit Inatsisartut inatsisaata  
allanngortinneqarneranik Inatsisartut inatsisissaattut siunnersuut**

**pillugu**

**Inatsisartut Akileraartarnermut Akitsuusiisarnermullu Ataatsimiititaliaata**

**ISUMALIUTISSIISUTAA**

**Siunnersuutip aappassaaneerreqarnerani saqqummiunneqartoq**

Inatsisartut Akileraartarnermut Akitsuusiisarnermullu Ataatsimiititaliaat  
suliarinninnermini ukuninnga inuttaqarpoq:

Inatsisartuni ilaasortaq Mikael Petersen, Siumut, siulittaasoq  
Inatsisartuni ilaasortaq Lars Sørensen, IA, siulittaasup tullia  
Inatsisartuni ilaasortaq Simon Olsen, Siumut  
Inatsisartuni ilaasortaq Godmand Rasmussen, Atassut  
Inatsisartuni ilaasortaq Mads Peter Grønvold, Kattusseqatigiit

Inatsisartut Akileraartarnermut Akitsuusiisarnermullu Ataatsimiititaliaata UKA  
2001-imi siullermeerinerup kingorna siunnersuut nassuiaatitaalu misissorpai.

**Tusarniaanermi akissutisiat**

Siunnersuutip matuma ataatsimiititaliamit suliarineqarneranut atugassanik tusarniaanermi akissutisiarineqartut nuutinneqarnerinik ataatsimiititaliaq piniarsimavoq.

## **Sassartitat**

Aallartitat kattuffinnit, ingerlatseqatigiiffinnit peqatigiiffinnillu makunaneersut ataatsimiititaliamut sassartinneqarsimapput:

Kalaallit Nunaanni Sulisitsiut Kattuffiat.

## **Paasissutissinneqarneq**

Ataatsimiititaliaq ataatsimiititaliap siunnersuummik suliarinninnerani atugassatut siunnersuut pillugu Naalakkersuisuni ilaasortamit Josef Motzfeldtimit peqataaffigineqartumik ilisimatitsiffiusumik ataatsimiisitsivoq. Ilisimatitsiffiusumik ataatsimiinnermit allakkiaq ilanngussatut ilan-ngunneqarpoq.

## **Siunnersuutip imarisai**

Ingerlatseqatigiiffiit akileraarutissanik kinguartitsisinnaanerisa killiliivigineqanngitsumik akileraarutitigut nalikilliliisinnaanerup killiliivigineratigut killiliivigineqarnissaa pillugu siunnersuummik Naalakkersuisut saqqummiussipput, taamaaliornikkut pigisat nalillit procentiat aalajangersimasoq aammalu ingerlatseqatigiiffiup akileraarutit ilanngaatinagit sinneqartoorutaasa affaat kisimik siunissami nalikilliliissutigineqarsinnaanngussapput. Killiliivigineqanngitsumik nalikilliliisinnaanerup killiliivigineratigut naatsorsuutigineqarpoq ingerlatseqatigiiffiit akileraarutaat kr. 30 mio.-inik isertitaqaataassasut.

Inunnut tunngatillugu siunnersuutigineqarpoq akileraarutitigut nalikilliliisinnaanerat namminersorluni inuussutissarsiuteqarnikkut isertitaasinnaasunit annertunerussanngitsaq.

Naalakkersuisut ilanngullugu siunnersuutigaat ingerlatseqatigiiffiit sermeq imerlu pillugit inatsit aamma aatsitassat pillugit inatsit naapertorlugit piiaanissamut akuersissummik peqartut akileraarutissaat 35 procentimiit 30 procentimut appartinneqassasut.

Akileraarutissat kinguartitat naammaginarnerusumik annertussuseqalerpata aammalu nunatsinni akileraartitseriaatsimik akitsuuseeriaatsimillu nunat assignngitsut aalajangersagaannut sanilliussinikkut misissueqqissaarneq naammassineqariarpat

ingerlatseqatigiiffinnut akileraarutip tamanut atuuttumik apparneqarnissaa ataatsimiititaliap qilanaaraa.

Amerlanerussuteqartut, tassaasut Siumup, IA-p Kattusseqatigiillu ilaasortaatitaasa, akileraarutissat kinguartitat naammaginarnerusumik annertussuseqalersinnaaqullugit killiliivigineqanngitsumik nalikilliliisinnaanerup sukateriffigineqarnissaa pisariaqartutut isigaat. Taamaattumik siunnersuutip akuersissutigineqarnissaa amerlanerussuteqartut inassutigaat.

Ikinnerussuteqartup, tassaasup Atassutip ilaasortaatitaata, oqaatigaa: Akileraartarnermut inatsisip allanngortinneqarnissaanik naalakkersuisut saqqummiussaata, siullermeerneqarnerani ATASSUT-mit akerliunerput sulii aalajangiussimagatsigu matumuuna oqaatigeqqipparput.

Soorlu inatsisip allannguutissaata siullermeerlugu oqaluuserineqarnerani erseqqissumik oqaatigigipput, naalakkersuisut oqaatigereermassuk nunatsinni aningaasarsiornerup qaffakkiartorunnaanera innuttaasut sillimaffigisariqaraat, pingaartumik namminersorlutik inuussutissarsiuteqartut tamatumani aamma eqqarsaatiginartut nalunnginnatsigik.

Taamaattumik eqqortuliornerusinnaanngilaq namminersortut sillimanissaannik ilimasaarsinnarlugit illua-tungaaticut pigisanik nalikilliliisinnaaneranik killiliivigineqarnissaanik piumaffigissallugit.

Aamma eqqaamassavarput selskabit namminersornerullutik oqartussat tamakkiisumik pigisaat, annertunerpaamik akileraarutissaminnik kinguartitsisarneranni aningassasanik annertunerpaamik akiligassaqarmata, taamaattumik selskabit qitsullugu ingerlatsiniarsarisut pilliutigineqarnissaat ATASSUT-mit akuerisinnaanngilarput.

Aamma eqqaamassavarput namminersortut akileraarutitut sinnerartoorutiminnik kinguartitsiinnaarneq ajormata, iluanaarutitik ingerlatat anertusarneqarnissaannut atortarmatigik, tamannalu nunatsinni suliffissaqartitsiniarnikkut minnerunngitsumillu akileraarutitigut isertitaqartarnermut assut iluaqutaasoq ATASSUT-mit sulii tapersorsorluarumagatsigu inatsisisissaq akuersaarsimanngilarput.

Namminersorlutimmi nukippasuit atoreerlugit ingerlallualersimasut akiliisinnaajunnaarlutik unittuussagaluarpata tamanna suliffissaarunnermik annertuumik Nunatta eqqorneqaatigissammagu, taamatullu pisorqassappat Nunarput akissaqanngilaq.

Taamaattumik akileraartarnermut inatsisisip allannguutissaanut akerliunerput aalajangiussimavarput.

Taama oqaaseqarluni Inatsisartut Akileraartarnermut Akitsuusiisarnermullu Ataatsimiititaliaata aningaasarsianit akileraarutit pillugit Inatsisartut inatsisaata

allannortinneqarneranik Inatsisartut inatsisissaattut siunnersuut  
appassaaniigassanngortippaat.

Mikael Petersen, Siulittaasoq

Lars Sørensen

Simon Olsen

Godmand Rasmussen

Mads Peter Grønvold